

四庫全書

集部

欽定四庫全書

梁谿集卷一百七十八

宋 李綱 撰

建炎時政記序

臣某伏被尚書省劄子三省同奉聖旨令臣省記編錄
建炎元年五月一日以後時政記繕寫成冊進御以待
制詔頒降史館臣仰惟皇帝陛下躬上聖之資撫中興
之運方時多艱入繼大統龍飛宋都為天地神明萬物
之主嗣位之五日即布大號考慎其相首及微臣特達

之知非常之遇古無與比顧如臣者所以報稱眷待之意宜何如哉然臣志廣材踈學識荒淺徒有愛君憂國之心初無周身防患之術備位宰相纔兩月餘功效無毫髮可稱罪戾有丘山之積奉身以退何補國家辜負明恩為罪大矣臣自去魏闕七更歲華薦致人言自取顛躓伏蒙皇帝陛下矜憐孤跡始終保全天地之恩何以論報今者又奉詔旨俾追記往事編錄成書將以付之太史氏顧臣自經憂患衰病交攻心志不寧動輒廢

失屢遭盜賊文籍散亡極意追思曾不能省記十之一
二至於日侍清光親承訓勅則銘鏤心腑豈敢弭忘謹
以省記到昨任宰相日所得聖語所行政事賞刑黜陟
之大畧著於篇至於日辰有不能省記則闕之庶幾信
以傳信疑以傳疑之意謹繕寫成上下兩冊冒昧投
進以塵乙夜之覽宣付史館備採擇焉臣干冒天威無
任惶懼戰越之至臣某昧死頓首頓首謹序

建炎時政記上

起建炎元年六月
一日止十二日

六月一日臣自資政殿大學士領開封府事蒙恩除尚書左僕射兼中書侍郎以是日到南京行在有旨宣召臣當晚赴內殿起居叙致謝恩訖力具奏陳材能淺薄不敢當除命乞改授其人以慰輿望上不允臣復奏曰臣未到行在數十里間御史中丞顏岐封示論臣章疏大意謂張邦昌為金人所喜更宜增重其禮臣為金人之所不喜宜置之閒地不當為相臣愚憊但知有趙氏

不知有金人固宜為其所惡然岐之論臣謂材不足以任宰相則可謂為金人所惡不當為相則不可臣愚不知金人與趙氏為仇敵其所喜者為趙氏耶其所惡者為趙氏耶且為趙氏之臣而金人喜之此必有以得其心者而反可以為相自古賣國以與人者皆為忠臣矣今陛下斷自淵衷特達用臣而外廷之論如此臣豈敢當此任願乞身以歸田里至於陛下命相於金人所喜所惡之間更望聖慮有以審處上宣諭曰岐嘗有此言

朕告之以如朕之立恐亦非金人之所喜者岐無辭而退此不足卹臣竊仰聖語英睿如此復奏曰陛下天縱聖智固不難察此然臣繇力薄材實不足以勝重任因再拜力辭上慰諭久之遣御藥邵成章宣押赴都堂治事且命執政聚於都堂

六月二日有旨令臣立新班奏事對於內殿同執政奏事訖臣留身再具奏力辭除命上慰諭不允臣感泣再拜曰臣愚陋無取不意陛下知臣之深也臣嘗觀唐明

皇欲相姚崇崇以十事邀說皆中一時之病類多施行
後世美之臣常慕其為人今臣亦竊不自揆敢以十事
仰干天聽儻蒙睿斷施行乃敢受命其未合聖意者願
賜詰難使臣得盡其說上可之因出劄子奏陳其一曰
議國是大畧謂中國之禦敵人能守而後可戰能戰而
後可和而靖康之末皆失之今欲戰則不足欲和則不
可莫若自治專以守為策俟吾甲兵修士氣振然後可
以議大舉其二曰議巡幸大畧謂車駕當一到京師見

宗廟慰都人之心權時之宜為巡幸之計以天下形勢觀之關中為上襄陽次之建康又次之宜詔有司預為之備其三曰議赦令大畧謂祖宗登極赦令皆有常式前日赦書一切以張邦昌偽赦為法如赦惡逆選人循資責降罪廢官盡復官職皆汎濫不可行謂當改正以法祖宗其四曰議僭逆大畧謂張邦昌為國大臣不能臨難死節而挾金人之勢易姓建號身處宮禁南面以朝其後勤王之師集迫不得已乃始奉迎朝廷尊崇之

為三公真王參與大政非是宜正典刑垂戒萬世其五
曰議偽命大畧謂國家更大變故鮮伏節死義之士而
奉敵旨受偽官屈膝於其廷者不可勝數昔肅宗平賊
而汙偽命者以六等定罪今宜倣之以勵士風其六曰
議戰大畧謂軍政久廢士氣怯惰宜一新紀律信賞必
罰以作其氣其七曰議守大畧謂敵情狡獪勢須復來
宜於沿河江淮措置控禦以扼其衝其八曰議本政大
畧謂崇觀以來政出多門紀綱紊亂宜一歸之於中書

則朝廷尊其九曰議久任大畧謂靖康間進退大臣衆多而太速功效蔑著宜謹擇而久任之以責成功其十曰議修德大畧謂上新即大位宜益修德以感天人心致中興之業得旨皆留榻上俟詳觀有當施行者降出是日降出議國是巡幸赦令戰守五劄子餘皆留中同日內降麻制皇叔祖慶遠軍承宣使知大宗正事仲宗可特授武勝軍節度使依前知大宗正事加食邑五百戶食實封二百戶皇叔祖靖康軍節度使知西京外

宗正事仲是可特授檢校少保依前靖康軍節度使開
府儀同三司嗣濮王加食邑一千戶食實封三百戶皇
叔寧遠軍承宣使知南京外宗正事士儂可特授光山
軍節度使依前知南京外宗正事食邑五百戶食實封
二百戶三省同奉聖旨宇文粹中落職提舉亳州明道
宮以江寧府軍卒叛失守故也

六月三日臣同執政奏事進呈議國是劄子有旨付中
書省遵守次進呈議巡幸劄子有旨催促留守司修治

京城祇備車駕還闕謁款宗廟委永興軍襄陽府江寧府守臣增葺城池量修宮室官府以備巡幸次進呈議赦令劄子僉謂赦惡逆已行難追改有旨選人惟在職者循資謫降罪廢官令刑部具元犯申朝廷等第叙復次進呈議戰議守劄子有旨令三省樞密院討論修舉軍政措置控禦條件以聞奏事訖執政退臣留身奏曰臣愚瞽輒以管見十事仰黷天聰已蒙聖慈施行五事如議本政久任修德三事無可施行自應留中所有議

張邦昌僭逆及受偽命臣寮二事皆今日刑政之大者
乞早降處分上宣諭曰執政中有與卿議論不同者更
俟款曲商量臣奏曰邦昌僭逆之跡顯然明白無可疑
者天下皆謂邦昌處敵中歲餘厚結敵人得其歡心攻
破都城遷二聖東宮盡取親王宗室以行邦昌蓋與其
謀此固不可知然邦昌當道君朝在政府者幾十年淵
聖即位首擢為相奉使敵人方國家禍難之時如能以
死守節推明天下所以戴宋之義以感動其心敵人未

必不悔禍而存趙氏邦昌方且自以為得計偃然當之
正位號處宮禁者月餘日敵騎既退四方勤王之師集
邦昌擅降偽詔以止之又遣郎官分使趙野翁彥國等
皆齎空名告數百道以行迨勤王之師日進邦昌知天
下之不與也不得已乃議奉迎邦昌僭竊本末如此春
秋之法人臣無將將而必誅况邦昌已僭竊罪宜如何
陛下欲建中興之業當自正朝廷始而尊崇僭逆之臣
為三公真王參與國政何以示四方執政中有議論不

同者乞降旨宣召臣得與之廷辯如臣理屈豈敢復言
上許之乃令小黃門徑就幕次宣召黃潛善呂好問汪
伯彥再對上語之故潛善力主之詰難數四乃屈服猶
持在遠不若在近之說臣曰邦昌當正典刑何遠近之
有借使在近當幽繫而反尊崇之如此何也潛善不能
對上顧呂好問曰卿在城中知其詳謂當如何好問曰
邦昌僭竊位號人所共知既已自歸惟陛下裁處又引
德宗幸奉天不挾朱泚行後以為悔以附會潛善不若

在近之說臣曰呂好問之言首鼠兩端且援朱泚以爲
例非是方德宗之狩奉天朱泚蓋未反也姜公輔以其
得涇軍心恐資以爲變請挾以行德宗不聽而其後果
然今邦昌已僭逆豈可使之在朝廷使道路指目哉因
泣拜曰臣不可與邦昌同列陛下必欲用邦昌第罷臣
勿以爲相無不可者上宣諭曰俟降出卿劄子來日將
上取旨臣拜謝而退是晚劄子降出

六月四日臣同執政奏事進呈論張邦昌僭逆劄子三

省樞密院同奉聖旨張邦昌僭逆理合誅夷原其初心
出於迫脅可特與貸免責授昭化軍節度副使潭州安
置又進呈論受僞命臣寮劄子上宣諭曰國家顛覆士
大夫不聞死節往往因以為利如王及之坐蕃衍宅門
詬罵諸王余大均誘取宮嬪以為妾卿知之否臣奏曰
自崇觀以來朝廷不復敦尚名節故士大夫鮮廉寡恥
不知君臣之義靖康之禍視兩宮如路人然罕有能伏
節死義者在內惟李若水在外惟霍安國死節顯著餘

未有聞願詔京畿諸路詢訪優加贈卹如王及之余大
均朝廷見付御史臺推鞠必得其實臣聞方金人欲廢
趙氏立張邦昌令吳玠莫儔傳道意旨往返數四京師
人謂之捷疾鬼王時雍徐秉哲奉金人旨追捕宗室戚
里令居民結保不得容隱以衣袂聯屬以往若囚繫然
其後迫道君東宮后妃親王出郊皆臣子之所不忍言
又受偽命皆為執政此四人者宜為罪首上以詢呂好
問而好問以為有之得旨皆散官安置餘以次謫降內

王及之余大均周懿文胡思陳冲等並令御史臺疾速
取勘俟案到日取旨李若水已贈官外霍安國特贈延
康殿學士有死節者令諸路詢訪以聞又進呈御史中
丞顏岐待罪章疏有旨除待制提舉宮觀執政退臣留
身奏事上宣諭曰卿昨日內殿爭張邦昌事內侍輩皆
泣涕卿今可以受命矣臣拜謝曰陛下英睿天縱決斷
如此天下不勝幸甚臣雖愚陋敢不黽勉以圖報稱上
宣諭曰屢語執政令置登聞檢鼓院以通四方章奏至

今猶未措置卿可便與施行臣退批旨置登聞檢鼓院
於行在便門之外差官吏權攝是日三省樞密院同奉
聖旨察官職官今後依官制施行錢伯言除開封尹孫
竢除應天尹權邦彥差知東平府呂頤浩差知揚州陳
邦光差知廣州唐懋差知荆南府王以寧差知鼎州

六月五日臣同執政奏事進呈劄子大畧謂河北河東
兩路國家之捍蔽河北西路三帥府二十餘郡靖康末
所失者真定懷衛濬一帥府三郡而已其餘至今皆為

朝廷堅守一路兵民有城郭者依城郭無城郭者依大河西山自相結集日以蠟書號籲朝廷乞師請援河東亦然但所失州郡視河北為多欲乞於兩路置司措置因其人而用之將來以河外郡縣悲議封建使自為守朝廷量力以助之則藩籬固而中原可安儻捨此而不為則兩路之人且歸怨於朝廷強壯狡獪者反為敵用將何以待之今日所當先務者莫急於此有旨河北置招撫使司河東置經制使司委官以擇可任使副者具

姓名以聞是日三省同奉聖旨以趙子崧守陳州閻孝忠守蔡州黃叔敖守襄陽府趙子櫟守汝州李彥卿守漢陽軍程千秋守江陵府公安縣捍禦有功子崧轉兩官孝忠轉一官除直秘閣叔敖轉一官除秘閣修撰子櫟除寶文閣直學士彥卿除直秘閣千秋轉一官通判江陵府王襄責授中大夫秘書少監分司北京襄陽府居住趙野責授中大夫秘書少監分司南京青州居住以言者論其任總管日逗遛不進故也

六月六日內降手詔朕以菲德獲承宗祧以臨士民之上屬時多艱未知攸濟慄慄危懼若將隕于深淵洪惟祖宗膺受天命覆育函夏百七十餘載德隆恩普振古所無道君太上皇帝以憂勤而內禪孝慈淵聖皇帝以恭儉而纂圖海內乂安蒼生蒙福適金人之入寇挾詐謀以款師待以不疑墮其姦計神都失金湯之險翠華有沙漠之行二聖既遷六宮皆從迨朕叔父弟昆宗室戚屬悉被驅逼禍敗之臻從古未有是用夙夜震悼於

朕心念父兄幽辱於敵廷憫生靈重罹於兵革飲泣嘗
膽不遑寧居惟爾四方士民抱負忠義其伊恤朕躬以
共濟于艱難以致安于宗社載念行在將士適當隆暑
暴露之久尤軫朕懷當特加犒設州縣民戶募師勤王
調發之煩誠可嘉憫當厚與撫循賦斂之厚當議蠲減
法令之弊當議改更潰兵為盜因間擄掠殘破郡邑雖
已降赦令當遣使招集許令自新賊吏為姦乘時掊克
重困吾民罪不可貸當遣使按治寘於典憲靖康之間

忠義敢言之士或至竄逐當悉召還今日以往智謀奇
畫之人如能獻陳當悉擢用旁招俊乂竄黜姦回協成
治功以篤中興之烈於禎天下之士大夫未忘我之祖
宗當同心以相扶持天下之軍民不願淪於仇敵當協
力以相保守國勢既昌天命益固庶幾隣敵悔禍奉還
鑾輿則予一人以寧爾亦有無窮之聞不其韙歟故茲
詔示想宜知悉是日三省同奉聖旨傳墨卿除禮部尚
書郭三益除刑部尚書周武仲除吏部侍郎曾楙除禮

部侍郎董耘除兵部侍郎許景衡胡安國並除給事中
劉珣除中書舍人曾開復待制知潭州吳巖夫除光祿
卿辛炳除左司員外郎李光除秘書少監翁彥深除太
常少卿

六月七日三省同奉聖旨謫授鳳州團練副使江州安
置張所通直郎直秘閣通判河陽府事傅亮召赴行在
議事以臣所薦欲委以河北河東路招撫經制司也是
日三省同奉聖旨李回謫授朝奉大夫秘書少監分司

南京袁州居住以言者論其防河退遁及嘗受僞命故也

六月八日內降手詔朕惟祖宗創業守成垂二百年涵養士大夫至矣靖康變故仕於中都者曾無仗節死難之士而媮生取容何其衆也甚者乘時為姦靡所不至實為中國羞公議弗容姑取跡狀尤顯著者量加竄黜為臣子之戒夫節義正所以責學士大夫也至於武臣卒伍理當濶畧以責後效惟王宗澣首引衛兵逃遁致

都城失守不可不責其餘姑務含容一切不問咨爾有
衆其體至懷故茲詔諭各宜知悉是日三省同奉聖旨
謝克家除述古殿直學士提舉杭州洞霄宮季直罷太
常少卿主管亳州明道宮莫砥除軍器監陳公輔除吏
部郎官程瑤除司封郎官余應求除考功郎官陶愷除
度支郎官鮑輝除兵部郎官滕庾除都官郎官陳彥文
孫默李積中王愈程邁並令乘逆馬發來赴行在洪芻
罷諫議大夫張卿材罷刑部郎官胡思王及之余大均

周懿文陳冲並先次放罷以御史臺勘司有請也


六月九日三省樞密院同奉聖旨李若水忠義無與比
倫已推恩外可特賜謚劉韜能死節不為敵用與追復
銀青光祿大夫特贈資政殿大學士許翰楊時晃說之
並令乘遞馬發來赴行在吳玠責授昭化軍節度副使
永州安置莫儔責授寧化軍節度副使全州安置徐秉
哲梅州安置王時雍高州安置

六月十一日三省樞密院同奉聖旨新政之初應干指

揮內外官司各當體念國步艱難悉心虔奉尚慮流俗
玩習將為虛文顧避懷姦推行滅裂或用事剝下背公
自營肆為騷擾有害新政並仰監司互相體察犯人重
寘典憲仍令御史臺體訪彈奏孫昭遠差知河南府兼
西道都總管俞向差知陝府並填見闕

六月十二日三省樞密院同奉聖旨史徽特落致仕除
司農少卿吳給除左司郎官張公濟除駕部郎中郭求
除河北東路提刑周格除京東西路提刑謝貺除京西

北路提刑李西美除荆湖北路提刑並填見闕



梁谿集卷一百七十八

欽定四庫全書

集部

梁谿集卷一百

七十九
八十

詳校官庶吉士_臣張溥

侍讀_臣孫球覆勘

總校官知縣_臣楊懋珩

校對官中書_臣潘奕萬

謄錄監生_臣牟焜

欽定四庫全書

梁谿集卷一百七十九

宋 李綱 撰

建炎時政記中

起建炎元年六月
十三日止六月終

六月十三日內降赦書一道門下朕紹隆丕緒寅御多方置大器以求安涉巨川而思濟勤于邦以圖天下之逸儉于家以資天下之豐懍乎負荷之難惕若繼承之重膺受祖宗之貽燕昭格穹昊之貺臨有開昌期誕生

元嗣庚伏火見協長夏懋育之辰玉裕淵清稟璿源英
秀之氣實廟社無疆之福示本支有衍之符以奉二聖
覆露之慈以係四海愛戴之望循攷累朝之舊典咸推
利物之深仁矧在多艱敢忘敷慶宜覃曠蕩之澤式契
榮懷之心可大赦天下應赦書到日昧爽以前罪人除
犯劫殺謀殺故殺鬪殺並為已殺人者并十惡罪至死
偽造符印放火官員犯入已贓將校軍人公人犯枉法
監主自盜賊不赦內枉法自盜罪至死情理輕者奏取

指揮闕殺罪至死情理輕者減一等刺配千里外牢城
斷訖錄案聞奏其餘罪無輕重已發覺未發覺已結正
未結正咸赦除之應舊係籍及上書人朝廷累降指揮
檢舉叙復至今經隔年月尚未結絕宜並給還元帶官
職贈謚碑額等已經給還而未足者並依元初指揮其
未責降以前官職應得遺表或致仕恩澤者亦令吏部
刑部條具申尚書省取旨應靖康元年邊事後來文武
官因病陳乞致仕朝廷不從所乞內有身亡之人特許

依條陳乞致仕恩澤及陳乞致仕緣道路不通不曾被
受致仕勅命者亦許所在州軍保明特與依條推恩應
士庶投獻章疏見委官者詳如有利害灼然可採令看
詳官先次保明申尚書省當議旌擢以為激勸勘會科
舉之弊至此極矣苟無變通則忠實異材之士何由而
出可講元祐詩賦經術兼收之制庶學者近正仍令禮
部疾速條畫聞奏緣已降指揮建炎二年正月九日鎖
院省試今來日已逼近難以遽改可自後舉依此施行

應諸路解發材武人并錫慶院材武人昨有偶緣事故
越試不及之人竊慮遺材仰經禮兵部投狀勘驗詣實
當議特與別行收試具合格姓名申尚書省取旨推恩
應將士實有戰功緣罪停廢之人並特與牽復仍令所
在官司發赴行在當議量材選用應諸路有材勇謀畧
之人衆所推伏或曾經戰陣得功可以倚仗委本州具
姓名保明解發赴行在御營使司當議量材錄用每州
三人應諸路勤王人兵有曾收復州縣立功之人仰四

道都總管及經制使等同結罪詣實保明聞奏雖不曾立功曾到京城下或元帥府已結局遣回而所轄人兵不曾逃散者候到本處仰本州具元發回及已到人數元管押人職位姓名并元借官職保明聞奏當議特與推恩應遣回勤王人兵所帶器甲並於所到州縣先次寄納如因在路遺失軍器趕趁隊伍不及逃竄之人限赦到一月經所在陳首並與免罪發遣歸元來去處依舊收管仍給沿路口券其因沿路失於機察致散漫劫

掠良民者可責委隨處統領等官將犯人便依軍法務
要整肅所過州縣並先具統制等官職位牒報候將來
見得沿路不曾作過令元起發處具統制統領等官職
位姓名保明申尚書省取旨推恩今日已後或失鈐束
部轄亦當重行黜責昨太原真定等處州郡緣金人攻
圍其官兵統制兵將官等有能竭節戰守遂致陷歿之
人可疾速契勘推恩厚撫家屬內忠義顯著者務加優
異以為將士殉國用命之勸近緣軍興應召募民兵義

兵統領之人多是擄掠良民強黥其面共肆劫奪念非
本心理宜優恤近雖已有放散歸農指揮竊慮統領之
人拘留未放並仰經所在官司陳訴給公據令各歸業
已前罪犯一切不問令州縣多出文榜曉諭訪聞昨因
金人驅領及取過人口有逃遁回歸及有失業逃避人
往往被官兵等人不為辨驗復為驅領隨行甚可矜憫
仰限赦到十日內將人口放令逐便限滿不放並行軍
法仍仰統制主將等常切覺察應昨因京城失守死節

守禦戰歿文武官已降指揮令本壁統制官保明特與
推恩訪問官司多是非理沮難逗遛行遣致死事之家
不即霑恩可令所屬疾速施行如違當行人重行停降
勘會近降赦恩軍人丁夫等逃亡及潰散官兵并百姓
因金人所至失業嘯聚人已立限首身尚慮有出首未
盡之人并今赦到日已前逃亡軍人等並限一月許令
出首餘依已降指揮應諸班直諸軍親從親事官昨因
京城失守踰城逃遁雖累降指揮立限許令自新尚恐

懼罪未敢出首限赦書到一月內許於所在州軍自陳
仍仰逐州給在路口券牒送在京所屬已前罪犯一切
不問依舊收管如尚敢不首復罪如初及仰所屬月具
已未收管人數申樞密院應未招降強寇如願往出戰
自効者限赦書到一月日內經所在州縣或統制等官
出首具首領人數姓名職位聞奏當議推恩令隨統制
官前去有能立到奇功當優與獎擢應緣金人并盜賊
殘破州軍縣鎮逃避官吏等雖已降指揮立限許還職

任竊慮限滿未有還歸之人可限今赦到半月內許歸
舊任職役其被殺官仰本路提刑司勘會諸實因依保
明聞奏特與推恩應京城失守潰散使臣昨已降指揮
立限赴部公叅違限不赴者並特勒停如有似此未曾
公叅之人特與免罪許再限一月叅部依條注擬如限
滿不赴公叅復罪如初應歿於王事之人累降指揮令
所屬保明推恩官司循習殊不體國以詔旨為虛文致
死事之家終不霑恩無以激勸忠義自今仰本家自陳

未經保明者令所屬限三日保明已經保明到者限三日推恩如違人吏重行典憲仍令御史臺彈劾以聞應陝西逐路昨因夏賊侵犯去處有立功并亡失將士近緣道路不通未經保明推賞者仰帥司限五日開具實立功并亡失將士等保明聞奏當議推恩不管漏落應昨緣軍興諸色人借支過官馬除實因戰鬪亡失與免賠償并見差出許乘騎外其餘合回納者限一月於所在官司送納如出限隱藏不納許人告坐贓科罪應緣

昨來軍興遺棄器甲頭刃之類并令所在官司拘收如
及千件以上令逐路憲司保明聞奏當議優與推恩或
民間納及百件以上亦令憲司相度等第支賜百日外
不首納依私有法其拘收到名數並令如法編揀排垛
內斷爛不堪者令憲司委官措置修整仍先具拘收修
整到名數封樁處所申樞密院應因軍興前後民間勸
借獻助錢物雖已委逐州長貳責限依格書填告命給
還尚慮其間阻節如有委實獻納錢物限外未經推恩

給告之人許徑詣尚書省陳訴如有照據文字當議依
格書填給降勘會昨緣金人入寇應宮觀寺院曾造發
過乾糧應副軍前不無騷擾陪費可在京委鴻臚寺在
外委轉運司保明實費之數聞奏當議特與給降度牒
勘會近降赦恩昨緣金人拘留未還等人許支行請給
竊慮經歷官司及倉庫不即勘給如敢稽違許經開封
府陳訴根究重行斷遣應宗室昨因取往軍前今來却
有回歸者其已前積下應干請給等並與一併勘支應

河北河東守臣親屬差往逐州幹辦淹留敵寨未歸其家屬在京或寄寓他郡關人照管恐致失所許經所在官司自陳支賜銀絹五十疋兩其幹辦官回日陞擢應百姓昨緣投充敢勇效用因出戰陷歿其家老小無人養贍仰本路監司多方存恤無令失所應出戍軍兵家屬仰所在州軍常切存撫無致少有失所應諸州縣有因潰散人兵及盜賊燒劫屋業之家特與放免今年夏料屋稅內被殺或逃避止有婦人小兒貧乏不能自存

者仰所屬抄割依災傷七分法賑給施行仍多方招誘
逃避人戶歸業應諸處民戶舍宅房廊寺觀如近經兵
火焚燒合行修葺往別州縣計置竹木之類者於所屬
給據經由去處與免抽稅仍不許官司拘截使用如違
許人戶越訴勘會昨因金人取索人口開封府差捉事
使臣火下等追捉訪聞內有婦女多被使臣火下百端
逼脅致畏避發遣願歸使臣火下等家藏住收養之人
事同強掠可限一月許令犯人及本家人力女使經官

陳首與被收藏人並放令逐便限滿不首復罪如初隣人并地分巡察使臣火下不覺舉減犯人罪三等不知情又減三等仍仰留守司御史臺密行覺察應逃亡罪人見今監錮父母妻男骨肉收捉者除係凶惡不原赦賊人外餘並放令逐便應犯罪合備賞并先以官錢代充而犯人委已貧乏無可催理見監勒犯人并干繫人名下均攤填納者並特與蠲放訪聞諸路州軍縣鎮酒務公庫等多將酒醋抑配與人戶及過往客旅僧道等

為害甚大仰監司守臣常切覺察舉劾官吏重行黜責
應陂湖塘灤舊許人戶採取元無收立課額後因官司
措置創立課利去處仰監司契勘悉行罷免依舊許民
戶採取如是係豪強占據仰所屬州縣嚴行禁止仍委
監司常切覺察訪聞京師物價未平致鰥寡孤獨不能
自存之人艱食除開封府見依法居養外竊慮所委官
不切用心致惠澤不下仰留守司更切檢察如法居養
如錢物不足具合用數申留守司支降應州縣官職田

訪聞多係實無田土抑令人戶輸納租課實為騷擾自
今仰提刑司勘會諸實常切覺察不得因前妄有騷擾
應諸路漢蕃弓箭手合該承襲之人因差使出外及別
緣事故有失陳乞致出違日限者候赦書到日限百日
經所屬自陳許令依條承襲近降赦文神霄宮罷舍屋
雜物錢糧田產拘收具數申尚書省及已降指揮江寧
府神霄宮元係保寧寺鎮江府元係龍遊寺泗州元係
普照寺洪州元係上藍寺并舒州如元係投子山寺院

並先次給還其餘州軍內有原係古寺改建者令本州
開具申尚書省勅建去處依赦施行所有正殿聖像如
元係佛像改塑即行改正若是勅塑即迎赴大慶觀勘
會合拘收舍屋等並謂舊有者其後來因緣取降特旨
并增置到者並令轉運司拘收應副省計及古寺係謂
李唐以前古跡如泗州普照寺舒州投子山大名府大
安寺之類仰州郡疾速遵依已降指揮施行無致違戾
應昨緣軍興諸官司支借過某軍闕額封樁錢物及收

租錢廢監省費錢死馬肉贓錢不堪馬價錢權住撥還
候邊事寧息日委提刑司具數申樞密院立限撥還行
在百司已降指揮不以假故日逐供職訪聞東京官司
多不入局竊慮士人民戶合有整會事理不無阻節及
勘會累有指揮應覃恩轉官及叙復磨勘擬注之類并
已前積壓未了文字並令東京取會上鈔等其曹部官
司往往推注不為施行致使士民往回道路良為勞苦
自今東京官司須管不分假故赴職檢詳累降指揮遵

守行遣不管依前留滯如違許士民赴行在陳訴當議
重行責罰應朝廷寬恤事件務實惠及民如所屬不切
奏行但為虛文致民戶陳訴當議重寘典憲應義夫節
婦孝子順孫委所在長吏常切存恤事狀顯著者具名
聞奏應五嶽四瀆名山大川歷代聖帝明王忠臣烈士
載於祀典者委所在長吏精潔致祭於戲飛龍乘時體
黃離繼明之治夢熊占寢應蒼震一索之祥均布湛恩
用節多喜咨爾有衆咸悉至懷赦書日行五百里敢以

赦前事言者以其罪罪之主者施行先是上登寶位赦書不曾該載河北河東兩路及四方州縣勤王之師至是得旨該載故於河北河東路及勤王之師指揮為詳是日三省樞密院同奉聖旨唐重除本閣學士差知京兆府范致虛發來赴行在李復陞職一等差知秦州趙明誠發來赴行在鄭驤除直秘閣差知同州

六月十四日內降勅書一道勅河北河東諸路州縣守臣將帥忠義軍民等朕惟祖宗德澤在民垂二百年天

下又安靡有變故而宣和靖康以來國家多難金人內侮道君太上皇帝下哀痛之詔講揖遜之禮比德堯舜古今鮮倫孝慈淵聖皇帝以恭儉之德爰受內禪海內欣戴日俟治康而暮歲之間戎馬再侵墮敵姦計但以講和一事終至宗社阽危既盡取玉帛女子公私財力為之耗竭乃始劫遷二聖中宮洎皇族尊幼中外嫺戚以行敵人之禍振古未有朕以介弟受命摠師臣民推戴迫以大義入繼大統重以父兄之辱飲泣嘗膽疾首

痛心願與天下忠臣義士共濟艱難而近者使臣來自朔部審聞兩路守臣義不愛生誓以死守敵雖憑犬羊之衆敢肆攻圍而能率勵士民屢挫敵威其忠義軍民等倡義結集動以萬計邀擊其後功績茂著朕甚嘉之夫河北河東國之屏蔽也朝廷豈忍輕棄靖康之間特以金人憑陵不得已割地賂之將以保全宗社止兵息民而金人不道攻破都城易姓改號劫鑾輿以北遷則河北河東之地又何割哉已命遣師以為應援應兩路

州縣守臣及忠義之士如能竭力捍禦保有一方及糾集師徒力戰破賊者至建炎二年當議酬其勲庸授以節鉞其餘官吏軍兵第加優賞應稅賦貨財悉許移用官吏將佐悉許辟置朝廷更行量力應副為國藩屏以昭茂功庶幾中原弭寧生靈休息敵人悔禍二聖有可還之期則予一人膺受多福爾亦有無窮之聞不其韙歟故茲詔示想宜知悉是日三省樞密院同奉聖旨河北西路河東路守臣各轉兩官有職名者進職餘具職

位姓名以聞又詔自今有能收復兩路已陷州郡及救
解危急保全一方功效顯著者除本處節度觀察團練
防禦使依方鎮法又詔兩路軍民自今不得撰造事端
以疑慮擅殺官吏等又命使臣齎夏藥徧賜兩河守臣
將佐又命摧貨務印造見錢鈔遣使齎送兩路州郡又
命降見錢鈔三百萬貫付河北東路陝西路漕司廣糴
應付兩路又命起京東路夏稅絹於大名府樁管川綱
河東衣絹於永興軍樁管以待兩路支俵皆上意也於

是兩路知天子德意人情翕然蠟書日至間有破賊捷報敵人圍守諸郡者往往抽退

六月

闕

日三省同奉聖旨汪伯彥除知樞密院事黃

潛善兼門下侍郎戶部尚書張慤到行在令日下供職

六月

闕

日臣同執政官奏事進呈臣寮章疏論受偽

命臣寮多已行遣有未及者皆等第施行如十友之類令留守司詢訪姓名以聞其言頗及呂好問好問在假上章求去有旨除資政殿學士知宣州

六月

關

日三省樞密院同奉聖旨沿河置巡察使自

河陽抵濱滄凡六處各有地分以為斥候進呈臣寮章
疏論靖康末折彥質為宣撫副使逃入川陝錢蓋為制
置使逃至湖北許高許亢總兵防河逃至江南不懲戒
則後孰肯任責者有旨彥質責授散官昌化軍安置蓋
落職降官分司高亢編管海外州軍會南康軍奏高亢
寓其境上欲謀變知軍李定通判韓濤以便宜誅之而
待罪僉謂其擅殺為非是臣奏曰淵聖委高亢守河付

以兵將甚衆賊將至而先走以鐵騎五百自潁昌挈家趨江南沿路劫掠甚於盜賊朝廷不能正軍法而一軍壘守倖敢誅之必健吏也使後日受命捍賊者知退走而郡縣之吏有敢誅之者其亦少知所戒是當賞上以臣言為然乃命各轉一官以賞之是時開封尹王襄罷大名尹徐處仁薨東京及北京留守闕官有旨宗澤除延康殿學士知開封府兼東京留守杜充除待制知大名府兼北京留守以劉錫知滄州又命錢蓋復官依舊

為陝西經制使初蓋在靖康間嘗建議河外湟鄯之地
於朝廷無毫髮利而歲費不資為中國患不若求青唐
之後而立之使撫有其舊部以為藩臣有益麻党征者
故王之子素為國人信服儻封立之必得其力至是用
其策故遣蓋為使齎告賜益麻党征措置湟鄯事因調
發五路軍馬以赴行在

六月

闕

日臣同執政奏事進呈劄子一曰募兵二曰

買馬三曰募民出財以助兵費募兵劄子大畧謂國家

以兵為重方熙豐之時內外禁旅合九十五萬人至崇觀間闕額不補者幾半西討夏人南平方寇北事幽燕所折閱者又三之一至靖康間金人再犯闕潰散逃亡者又不知其幾何今行在禁旅單弱何以捍強敵而鎮四方為今之計莫若取財於東南募兵於西北方河北之人為金人騷擾未有所歸之時而關陝京東西流為盜賊強壯不能還業者甚衆乘此遣使四路優給例物以招募之新其軍號勒以部伍得十數萬人付之將帥

以時教閱訓練不年歲間皆成精兵於要害州郡別置
營房屯戍使之更番入衛行在此最今日之急務也買
馬劄子大畧謂金人專以鐵騎取勝而中國馬政不修
騎兵鮮少乃以步軍當其馳突宜乎潰散蓋祖宗朝養
馬於監牧孳生蕃盛所在雲布故軍旅之用足至崇觀
間監牧廢而為給地牧馬有名而無實其後燕山陷沒
馬之入於敵人者不可勝數金人初至闕河北京畿為
之一空後破都城首下令括馬而京師之馬入於敵者

萬有餘匹今行在騎兵不多獨陝西京東西諸路尚有私馬宜降指揮立格尺以善價買之可以濟一時之乏民間養馬必皆上戶及僧道命官之家中下戶自無馬可養取之既不厲民而旬月間馬遂可集此今日不得已之務也募民出財劄子大畧謂國家罹寇難京師帑藏悉為金人所取外路州郡以調發勤王之師財用為之一空今又募兵買馬招捉盜賊措置邊事應副殘破州郡振舉百度以圖中興非常賦之所能供辦又不可

橫賦科取於民如免夫錢天下至今咨怨惟上二等物力有餘之家可行勸誘使斥其贏餘以佐國用而以官告度牒之類償之使朝廷軍馬精強措置邊事就緒盜賊哀息彼乃得保其財產不然雖欲保家室不可得況財產哉宜命州縣委曲諭以德意必有樂輸從命者此又今日不得已之務也上命以劄子付中書省條具以聞次日將上得旨於陝西河北路募兵各三萬人京東西路募兵各二萬人合為十萬許召募白身及於諸色

廂軍中揀選或招收潰散兵卒中改刺創置軍號驍勝
壯捷忠勇義捷龍武虎威折衝果毅定難靜邊九十軍
每號四軍二千五百人例物白身人全給依上禁軍法
餘給半許用諸路闕額禁軍錢常平司錢不足即自朝
廷應副內京東西委兩路提刑司河北委招撫司陝西
委經制司召募每募及一軍就本路差有材武大小使
臣充將官部隊將管押赴行在聽候差使又命買馬分
為三等格尺以定價直除命官將校見養馬不許括買

外餘並籍記赴官揀選及格尺中披帶者即時給還價
直每及百匹差官或將校一員管押赴行在隱寄安冒
有馬不籍及無馬而抑勒令置買者並科違制之罪委
逐路提刑司總之又降詔曉諭州縣勸誘能出財助國
籍記姓名多寡申朝廷給降度牒償之入財多者取旨
推恩應勸誘到錢物並別項椿管聽候指揮專充募兵
買馬緣邊事支用有敢科配騷擾者命官竄責吏人決
配凡募兵買馬勸民出財奉行有叙並保明推賞

六月

閏

日臣與執政官奏事進呈劄子議控禦策大

畧謂唐之方鎮當時實賴其力以定禍難第措置失宜而其後行姑息之政威柄浸移乃有尾大不掉之患祖宗草去前弊削弱州郡之權一切委以文吏非沿邊諸路雖藩府亦屯兵不多無敢越法行事以處太平無事之時可也一旦敵騎長驅盜賊蠭起州郡莫有能抗之者遂至於手足不足以捍頭目為今之計莫若稍倣方鎮之制擇人任之假以權柄減上供錢穀使之養兵而

訓練之大小相維遠近相援庶幾可以救今日之患夫
方鎮者節度使之兵也其次有觀察團練防禦今既以
為階官不可復改宜於沿河沿淮沿江諸路置帥府要
郡次要郡使帶總管鈐轄都監以寓方鎮之法許其便
宜行事辟置僚屬將佐以治兵不數年間必有可觀今
日控禦之策無大於此僉謂帥府要郡之制可行但未
可如方鎮割隸州郡得旨京東東西路京西南北路河
北東路永興軍路淮南江南兩浙東西路荆湖南北路

皆置帥府要郡次要郡帥府為安撫使帶馬步軍都總管要郡帶兵馬鈐轄次要郡帶兵馬都監皆以武臣為之副改路分為副總管路鈐轄為副鈐轄州鈐轄為副都監總管鈐轄司許以便宜行軍馬事辟置寮屬依帥臣法屯兵皆有等差遇朝廷起兵則副總管為帥副鈐轄都監各以兵從聽其節制正官願行者聽轉運使副一員隨軍一員留本路提點刑獄彈壓本路盜賊遇有盜賊則量敵多寡出兵會合以相應援本路帥臣當職

官措置兵馬先就緒者當優議旌賞

六月

闕

日三省樞密院同奉聖旨責授鳳州團練副

使張所借通直郎直龍圖閣除河北西路招撫使令閣門引見上殿

六月

闕

日臣同執政官奏事進呈臣寮劄子乞增置

弓手人數每縣置武尉一員及河北路置巡社差官總領得旨從之

六月

闕

日三省樞密院同奉聖旨三省樞密院同置

賞功司三省委左右司郎官樞密院委都承旨檢察置籍以受功狀違限不施行者必罰受賂乞取者依軍法許人告軍士遇敵逃潰者斬因而為盜賊者誅其家屬凡軍政申明約束及更改法制者數十條皆用勅榜揭於通衢

六月

關

日三省樞密院同奉聖旨温州觀察使樞密

都承旨王璵除河東路經制使通直郎直秘閣傅亮除河東路經制副使皆令閣門引見上殿

六月

關

日三省樞密院同奉聖旨差御營司都統制王淵統制官張俊將帶所部軍馬捉殺陳州叛兵杜用都巡檢使劉光世捉殺黎驛作過馬忠下叛兵統制官喬仲福等捉殺山東賊李昱統制官韓世忠捉殺單州魚臺軍賊先是僉議於上前謂盜賊勢須招撫因而用之然非朝廷威令已振則雖欲招撫因而用之勢不可得今去行在不二百里間有此數處盜賊竊發多者至數萬少者不下七八千若不遣將帥應時討殄何以使

四方羣盜恐懼聽命有旨令召王淵等到都堂戒勵令各占地分須管破蕩仍諭以自上即位方此遣兵正當信賞必罰能立功者優議推賞敗衄誤事亦必行法之意諸將喜躍自奮不旬月間四處皆告捷王淵生擒杜用破其衆二萬人喬仲福斬李昱首以獻破其衆三萬人黎驛魚臺賊皆七八千討捕淨盡王淵劉光世以功並建節餘人等第進秩於是湖北羣盜閭瑾党忠薛廣祝靖等皆赴行在丁順楊進等皆河北巨盜赴招撫司

自効其餘皆赴東京留守宗澤納款東京西與淮南州
縣漸得休息

梁谿集卷一百七十九

欽定四庫全書

梁谿集卷一百八十

宋 李綱 撰

建炎時政記下

起建炎元年七月五
日止八月十八日終

七月一日臣與執政奏事進呈劄子大畧謂國家所以
備禦敵人者皆在邊郡城池器械一切備具故敵未易
攻今金人盜賊乃擾吾腹心而中原郡縣積習承平之
久城池堙頽並無器械何以禦敵官吏軍民多不能守

而郡縣遂以陷沒者非特士氣怯懦蓋亦以禦敵之具不備使然宜命諸路州郡以漸修葺城池繕治器械朝廷量行應副有能葺治備具者旌賞以勸得旨依奏應州郡欲修城池者申朝廷給降祠部應副

七月

闕

日三省樞密院同奉聖旨張懋除同知樞密院事兼提舉措置戶部財用王絢除給事中

七月

闕

日三省樞密院同奉聖旨差周望傳雱偕太常少卿奉使往金人軍前通問二聖起居上命臣擬撰

表本其起居道君太上皇帝表本曰臣某言神京不守
坐失金湯天旆啓行越在草莽凡居臣子之列均深痛
憤之情臣某誠悲誠感頓首頓首恭惟道君太上皇帝
陛下遊神穆清宅心昭曠法堯舜之遜禪濟國家之艱
難方交兩宮之歡永享四海之養隣邦犯順戈戟暗於
中原帝座移居鑾輿幸於朔野神人感憤華夏悲摧而
臣濫總帥權莫陪誓御迫羣臣再三之懇請謂大寶不
可以久虛勉徇羣情嗣守神器瞻行宮而靡及慕慈訓

以增懷輯睦師徒冀宗社之可保撫寧方夏佇車駕之
言歸謹遣通直郎試太常少卿臣周望奉表起居以聞
臣無任瞻天望聖激切屏營之至臣某頓首頓首謹言
其起居孝慈淵聖皇帝表本曰臣某言戎馬薦興環日
畿而布列帝都不守致天步之艱難萬國悼心三靈失
色臣某誠悲誠感頓首頓首恭惟孝慈淵聖皇帝陛下
法禹湯之恭儉體堯舜之聰明十載東宮令德聞於海
寓踰年南面仁政浹於寰區適當嗣位之初兩致隣邦

之寇割地增幣以生靈屈已而講和擐甲登埤為廟社
忘身而固守金湯失險羽衛啟行致翠華之蒙塵瞻紫
微而移座華夏失庇神人疇依而臣叨總師徒莫陪羈
勒迫羣臣之懇請嗣大寶以撫臨仰遵勤儉之風庶格
中和之治傷心北望緬懷異域而增悲整駕南還尚冀
敵人之悔禍謹遣通直郎試太常少卿臣傅雱奉表起
居以聞臣無任瞻天望聖激切屏營之至臣某頓首頓
首謹言

七月

闕

日三省同奉聖旨諸路發到米綱以三分之一留行在支遣二分撥入京師樁管先是汴河口決壞汴水不通綱運不至有旨差提舉京城所陳良弼同都水使者榮巖陳求道修治決水至是水通綱運漸至故有是命且令已卸空綱自京師船載六曹案帑及器甲等至行在

七月

闕

日臣同執政官奏事進呈劄子大畧謂承平之時雖無事當備官以張朝廷之容艱難之際雖多故

當省官以責事功之實至於祿廩亦當隨宜裁節以濟一時之急蓋世方多難賦入狹而用度廣非加裁節則何以為經久之制內自朝廷外至州縣監司宜省冗員以節浮費有旨省臺寺監以繁簡相兼學官館職之類比舊制減半開封府曹掾依舊改為推判官提舉常平司併歸提刑司兩浙福建市舶司併歸轉運司以司錄依舊為簽書節度判官廳公事曹掾官依舊為節度觀察軍事推判官支使掌書記錄事司戶司理司法叅軍

縣萬戶以上置丞不滿萬戶不置罷吏員三分之一堂吏依祖宗法轉官止朝請大夫初陳乞出官止為通判應前宰執子弟以恩數帶貼職及待制以上並罷宰執及見任宮觀待闕未有差遣京朝官以上俸錢並權減三分之一候事定日取旨

七月

闕

日三省同奉聖旨王圭除河北西路招撫司

叅謀官黃敦彥除河北西路轉運判官

七月

闕

日臣同執政官奏事上出絹背心宣示泣諭

臣等曰道君太上皇帝自燕山府密遣使臣曹勛齎來
背心領中有親書八字曰便可即真來救父母羣臣皆
泣奏曰此乃陛下受命於道君太上皇帝者宜藏之宗
廟以示萬世有旨從之

七月

闕

日借通直郎直龍圖閣河北西路招撫使張

所上殿面賜章服遣行所具畫一乞以京畿兵三千為
衛於大名府置司一面遣官於河北西路告諭招撫山
寨首領民兵候就緒日渡河先復濬衛懷州真定府次

解中山府等處圍乃以兵民給地養之如陝西五路弓箭手法仍乞緡錢百萬以為半年之費得旨從之

七月

闕

日京師龍德等宮津送到諸色寶器等上命

碎之於殿庭間衛士有持去者聽之中外莫不悅服

七月

闕

日臣與執政官同進呈御史臺鞫勘宋齊愈

事初齊愈為右司員外郎自圍城中出詣行在自陳以病在告不與偽楚事除諫議大夫既而臣寮論其首建議請立張邦昌以合金人之意按據甚明有旨送御史

臺鞠治證驗明白齊愈款服至是案上三省樞密院同奉聖旨依法定斷仍榜其罪於通衢

七月

闕

日王瓊傳亮上殿面賜瓊器甲戰袍束帶賜

亮章服遣行河東路經制司畫一陳乞降指揮陝西路轉運司應副財用就五路舊西兵舊弓箭手將家子弟中募兵二萬人并朝廷所付兵萬人通成三萬就陝府置司與金人河中府解州對壘一面遣人結約河東山寨豪傑民兵收復州縣候兵集日乘機會過河得旨從

之

七月

闕

日臣同執政官進呈東京留守司鞠治華國

靖恭夫人李氏公事初張邦昌既僭竊居福寧殿李氏奉之時以果實為獻邦昌亦厚答之遂以養女陳氏侍邦昌寢其後邦昌欲退歸府第因其姊入禁中乃留親隨人易陳氏以出邦昌出禁中李氏送至內東門有語指斥乘輿上聞之命留守司同御藥院於內東門推治李氏款服且言邦昌用乘輿服御及陳氏事上宣諭曰

邦昌敢居宮禁寢殿姦私宮人可以見其情狀有旨李氏決脊降配禁營務下名為妻

七月

闕

日三省樞密院同奉聖旨近降指揮諸路州

郡修葺城池繕治器械招募軍兵積聚糧草增添弓手團結民社措置郵傳緝捕盜賊建置帥府要郡推行軍政皆係急切事務訪聞州郡玩習因循殊不留意仰自今旬具施行次第申尚書省樞密院弛慢不職官吏許監司劾奏以聞常切准備朝廷遣使按察誅賞

七月十四日臣同執政官奏事訖留身奏上曰朝廷近
日外則經營措置河北河東兩路以為藩籬葺治軍馬
討平盜賊內則修政事明賞刑皆漸就緒獨車駕巡幸
所詣未有定所中外人心未安上宣諭曰但欲迎奉元
祐太后及津遣六宮往東南朕當與卿等獨留中原訓
練將士益聚兵馬雖都城可守雖金人可戰臣再拜曰
陛下英斷如此雖漢之高祖光武唐之太宗不是過也
中外未知聖意乞降詔以告諭之上從所請

七月十五日內降手詔朕惟祖宗都汴垂二百年天下
乂安重熙累洽未嘗少有變故承平之久超軼漢唐比
年以來圖慮弗臧禍生所忽金人一歲之間再至都城
信其詐謀終墮其計畫取子女玉帛遂邀二聖鑾輿六
宮戚屬悉擁以行敵人之禍振古未有四海臣子孰不
痛心肆朕纂承永念先烈眷懷舊京潛然出涕思欲整
駕還京謁款宗廟以慰士大夫軍民之心而兵火之餘
民物如故朕之父母兄弟宗族靡有留者顧瞻宮室何

以為懷是用權時之宜法古巡狩駐蹕近甸號召軍馬以防金人秋高氣寒再來內地朕將親督六師以援京城及河北河東諸路與之決戰已詔奉迎元祐太后津遣六宮及衛士家屬置之東南朕與羣臣將士獨留中原以為爾京城及萬方百姓請命於皇天庶幾天意昭答中國之勢浸強歸宅故都迎還二聖以稱朕夙夜憂勤之意應在京屯兵聚糧修治樓櫓器具並令留守司京城所戶部疾速措置施行咨爾士大夫軍民體朕至

懷無有疑慮故茲詔示想宜知悉

七月十六日三省樞密院同奉聖旨元祐太后以避家諱改稱隆祐太后以徽猷閣待制孟忠厚為迎奉隆祐太后提舉一行事務步軍指揮使郭仲荀統兵扈衛司封員外郎楊邁沿路州縣預行計置糧草濟渡舟船

七月十七日臣同執政官奏事進呈劄子大畧謂巡幸之策關中為上襄鄧次之建康為下今縱未能行上策猶當適襄鄧以係天下之心夫襄鄧西隣關陝可以召

兵北近京畿可以遣援南通巴蜀可取貨財東達江淮
可運穀粟山川險固民物淳厚此誠天設以待臨幸願
為今冬駐蹕之計得旨定議巡幸南陽以觀文殿學士
范致虛知鄧州委以修治城池繕葺宮室官府朝廷降
鹽鈔錢帛委轉運使范之才等儲峙糧草命發運司撥
江湖綱運由襄江通漕命四川變轉運輕貨陸路自陝
西江路自歸峽以入南陽

七月十八日三省樞密院同奉聖旨差戶部侍郎黃潛

厚為巡幸提舉一行事務膳郎員外郎陳充幹辦頓遞
行宮一行官吏將佐軍兵安治去處虞部員外郎李儔
幹辦相視橋道渡船并樁辦糧草發運使李祐為隨軍
轉運使

七月十九日三省同奉聖旨委兵部郎官并太常寺官
各一員候巡幸有日限三日計置合用舟船車乘等迎
奉神主赴行在及據合用人數就太廟親事官擡舁令
殿前司差撥禁軍三百人防護仍專委內侍官員充同

共都大主管其合行事件並仰條具申尚書省

七月

闕

日臣同執政官奏事進呈內降御札募兵改

刺新軍有害軍政臣奏曰元降募兵指揮許改刺者祇謂潰散西北兵卒無營房可歸者並非以見在營房兵卒許之改刺因以中書省元批旨進呈得旨依元降指揮施行

七月

闕

日三省同奉聖旨近降指揮諸路買馬每州

可祇令買百匹東南州軍不產馬處並免所有勸民出

財助國推賞指揮更不施行上意恐致騷擾故也

七月

闕

日三省樞密院同奉聖旨李擢為係淵聖皇

帝已曾責降特免散官安置責授軍器少監分司南京
筠州居住

七月

闕

日三省同奉聖旨錢伯言除吏部侍郎黃次

山除吏部郎官尹東珣除金部郎官周格改差兩浙路
提刑黃敷書除兩浙路轉運副使劉蒙除江東路轉運
使

七月

闕

日臣同執政官奏事訖留身奏事論及君子小人不可不辨上宣諭曰君子小人不難知但考其素行則知之臣奏曰陛下得知人之要中興之業不難致天下幸甚

七月

闕

日三省同奉聖旨董耘除兵部尚書晁說之除待制兼侍讀

七月二十七日內降手詔朕觀古之為士者何其分義之明而忠厚之至也承平之時靡好爵享豐祿相與同

安樂多事之際不擇地不苟免相與同患難故人之好
我至於示我周行王事靡盬至於不遑啓處而鹿鳴四
牡之詩作先王之澤可謂盛矣祖宗涵養士類垂二百
年教以禮樂風以詩書班爵以貴之制祿以富之於士
無負而士之所以圖報國家者不能無愧於古人日者
二聖播遷宗社幾至於顛覆而仗節死難者罕有所聞
其故何哉肆朕纂承慨然思任羣材相與協濟修政事
攘戎狄以奉迎鑾輿而士大夫奉公者少營私者多徇

國者希謀身者衆乞去則必以東南為請召用則必以疾病為辭沿檄以自便者相望於道途避寇而去官者日形於奏牘甚者至假託親疾不俟告下挈家而遠遯夫禮義廉恥正所以責士大夫也所守如此朕何望焉豈朕初嗣大位所以訓告者未至歟將士大夫狃於故習而未能遽革歟已詔甚失節者寘之極典其次投之遠方為多士萬世之戒其自今以往各恭乃職一乃心助予一人克復大業底綏四方以匹休於隆古敢有弗

率弗迪尚蹈前態在內委御史臺在外委監司彈劾以聞邦有常刑朕亦不敢赦故茲詔示想宜知悉

八月一日臣同執政官進呈御史臺鞫治陳冲余大均洪芻王及之等公事皆在圍城中誘置內人為妾及因抄劄金銀自盜入已上宣諭曰此何等時乃敢如此得旨余大均陳冲洪芻情犯深重各特貸命除名勒停長流沙門島永不放還張卿材責授文州別駕雷州安置李彝責授茂州別駕新州安置王及之責授隨州別駕

南恩州安置周懿文責授隴州別駕英州安置胡思責授沂州別駕連州安置

八月二日臣同執政官奏事訖進呈劄子大畧謂生於陵者安於陵生於水者安於水南方之人習水而善沒其操舟若神而北人有懼舟楫而不敢登者水戰之利正南人所宜應沿河沿淮沿江帥府要郡宜令造戰船募水軍凡習水而能操舟者皆籍記姓名平時許其自便有故則糾集而用之逐時教閱量行激賞必得其力

有旨令諸路招置水軍以樓船凌波為號差御營司幹辦官楊觀復齎空名告往江浙募人造船餘路委提刑司措置總領

八月三日內降白麻楊惟忠劉光世王淵並除節度使
八月闕日三省同奉聖旨右司諫潘良貴除工部員外郎觀察使龍神衛四廂都指揮使李庠除東京副留守
八月五日內降白麻除臣尚書左僕射兼門下侍郎除黃潛善尚書右僕射兼中書侍郎

八月六日得旨御營使副按閱軍馬

八月七日臣同執政官奏事進呈河北西路轉運副使權知大名府張益謙奏狀言招撫司騷擾不當置司北京及欲起北京屯戍兵給用器甲為非是緣置招撫司河北盜賊白晝殺人不若罷之專以其事委帥司臣奏曰張所畫一乞置司北京候措置就緒日渡河今尚留京師以招集將佐故未行不知益謙何以知其騷擾而言不當置司至於守兵器甲不可輟那當令招撫司具

合用數申陳自朝廷給降可也朝廷以金人攻圍河北民無所歸集為盜賊故置司招撫因其力而用之以解河北之急豈緣置司乃有盜賊今京東京西羣盜嘯聚攻掠州縣豈亦招撫司所致耶方時艱危朝廷欲有所經畧益謙小臣乃敢非理公然沮抑必有使之者不懲之無以戒妄議而沮姦臣上乃令降旨招撫司依畫一置司北京就緒日疾速渡河不得抽摘守兵具合用器甲數申朝廷應副如招撫到河北兵民嚴行鈐束無令

作過張益謙令分析以聞

八月

關

日三省同奉聖旨許翰除尚書右丞差內侍

押赴都堂治事

八月

關

日三省同奉聖旨范訥罷檢校官節度使與

承宣使淄州居住以言者論其為宣撫使及留守東京
不職故也

八月十二日臣同執政官奏事進呈河東路經制使司
奏狀元降畫一聖旨指揮許令於陝府置司候措置招

集軍馬齊集日渡河續奉聖旨令聽宗澤節制於陽武渡河伏乞明降指揮以憑遵守臣奏曰河東經制司所得兵不多自陽武渡河濬衛懷三州盡係金人所守便為生界難得糧餉萬一潰散即朝廷別未有一項軍馬可以措置河東不若令依元降畫一指揮且於陝府置司招集軍馬事體為便黃潛善謂逗遛不進致失機會臣奏曰河東經制司受命啟行纔方數日猶尚在京師恐難謂之逗遛今日事勢亦未見機會可乘不若盡將

帥之慮乃可責以成效用其言而績用弗成朝廷自有典憲議久不決


八月十四日內降御批傳亮兵少不可渡河可罷經制副使發赴行在

八月十五日臣以疾不任事上表劄乞罷尚書左僕射除在外宮觀差遣

八月十六日蒙恩差內侍宣押赴都堂治事上第二表劄

八月十七日蒙恩差內侍宣押赴內殿奏事上第三表
劄

八月十八日內降麻制除臣觀文殿大學士提舉杭州
洞霄宮當日罷任



梁谿集卷一百八十